

բոսնեցու աշակերտներին էր և հաստատուած էր նախ Աստապատում և ապա Սուհարայի կամ Սառաբաստայ վանքում՝ ՊԼԸ—ՊԾԱ թուականը՝ «Եւ ժողովեցան առ նա բազումք ի գրոց աշակերտաց և ի կրօնաւորաց և յուսումնասիրաց աւելի քան 60 կարգաւորք և ուսումնականք»\*: Նորան աշակերտութեան է գալիս և թովման ՊՈԴ(=1395) թուին, արդէն 17—20 ամեայ պատանի: Սարգիս վարդապետը մեռնում է ՊԾ—ՊԾԱ թուականին և նորան յաջորդում է իւր իսկ աշակերտներից Վարդան մինչև ՊԾԵ թուականը, երբ հալածուելով թշնամիներից՝ փախչում է Սալնապատու վանքը և այնտեղ վախճանւում\*\*։ Թովման զովասանքով և երախտագիտութեամբ է յիշում Սուհարայի ուսուցիչներին, առանց տեղեկութիւններ տալու իւր ուսած առարկաների մասին\*\*\*։ Այդ թերին լրացնում է Կիրակոս Բանասէրը, յայտնելով, թէ նա այնտեղ ուսել է «գի՛ եղանակս վարդապետական, որ է սահմանական, բաժանական, ապացուցական, վերլուծական», հետևողութեամբ Արիստոտէլի, ինչպէս որդեգրած էին ժԴ. դարու Հայոց վարդապետները, գլխաւորապէս Տաթևի դպրոցի ներկայացուցիչները։ Թովմայի աւագ ժամանակակից Յակոբ Ղրիմեցին, օրինակ, իւր տօմարական մակացութիւնների «Յաղագս թուականի» գլխի մէջ նոյն եղանակն է գործադրում։ Այս տեղեկութիւնից երևում է, որ թովման իւր փիլիսոփայական հմտութեան մի մասը, որ թուում է Կիրակոս, մասամբ այստեղ էր ստացել։

Թովմայի ուսման երրորդ օրջանն ընկնում է ՊԾԶ—ՊԾԹ թուերին։ Վարդան վարդապետի մահուամբ՝ ՊԾԵ թուին՝ որը են մնում նորա աշակերտները։ Դոցանից 12 հոգի, որոնց թուում և թովման, գնում են Տաթև, որ այդ ժամանակ արևելեան Հայաստանի լուսաւորութեան առաջին կեդրոնն էր Գրիգոր Տաթևացու վարժապետութեամբ։ Ժամանակի եպիսկոպոսն էր Տ. Առաքել, Տաթևացու քրոջ որդին և աշակերտը, ինքն էլ բանասէր և «իմաստասէր», յայտնի իւր տաղերով, Աղամ գրքով, քերականութեամբ և Սահմանաց գրքի լուծմունքով։ Տաթևացու շուրջն էին խմբուած այդ ժամանակ 60-ից աւելի աշակերտներ, որոնցից մի քանիսը նշանաւոր հանդիսացան մեր պատմութեան և գրականութեան մէջ։ Դոցա վերայ աւելանում են և Քաջբերունեաց երկրից եկած երիտասարդները։ Տաթևացին մեծ սիրով ընդունում է ուսումնատենչ երիտասարդներին, որ իւր հայրենակիցներն էին. «գի հայր նրա

\* Նոր նիւթեր. Ար. 735. 734|2. (16. 44/43): Մեծփոքի. Պատմ. 30—35.

\*\* Մեծփոքի. Պատմ. 47. 53—57. 49. 44.

\*\*\* Բացի Նախընթաց ցուցումներից տես եւ Նոր նիւթեր. Ար. 734. 736. 739. 762. (47. 49. 22. 23):